



Äntwert vun der Finanzministesch Yuriko Backes op d'parlamentaresch Ufro n°5971 vum 23. Mäerz 2022 vum honorabelen Deputéierte Marc Goergen iwwert d'Tankkarten

Den honorabelen Deputéierte stellt eng Rei Froen am Zesammenhang mat verschidden Artikelen, déi an der leschter Zäit an der lëtzebuergescher esou ewéi an der däitscher Press publizéiert goufen zum Thema vun de sougenannten Tankkarten.

D'Employeure kenne mat Energiekonzerner spezifesch Kontrakter ënnerschreiwen, fir datt déi hinnen Tankkarte fir hir Salariéen zur Verfügung stellen, déi domadder op ausgewielten Tankstellen - zum Deel och - méi bëlleg tanke kënnen. De Prinzip vun enger Tankkart gläicht deem vun enger Kreditkaart, just datt si nëmme bei verschiddenen Tankstelle kennen agesat ginn fir ze bezuelen.

Et ass fir d'éischt drop hinzewiesen, datt d'Notze vun Tankkarte vertraglech tëschent deene spezialiséierte Firmen a de Patrone gereegelt gëtt. D'Konditiounen vum Vertrag ginn exklusiv tëschent deenen zwou Parteien bestëmmt, déi och beinhalte kennen, datt d'Salariéë op ausgewielten Tankstelle méi bëlleg tanke kennen. De Staat huet deementspreechend keng Informatiounen derzou, wat an deene Verträge festgehalen gëtt. Tankkarten, déi fir privat Zwecker zur Verfügung gestallt ginn, stellen een *avantage en nature* duer, deen deementspreechend ze versteieren ass.

Des Weideren ass drop hinzewiesen, datt souwuel de Gesamtvolumen vun Diesel a Bensinn, déi mat Tankkarte bezuelt ginn, ewéi d'TVA, déi am Zesammenhang mat fossillen Dreifstoffen zeréckbezuelt gëtt, statistesch net erfaasst ginn.

Lëtzebuerg, den 21. Abrëll 2022

D'Finanzministesch

(s.) Yuriko Backes